

14/11/2001

Pas kesal tidak dimaklum kedatangan PM ke Terengganu

KUALA TERENGGANU, Selasa - Kerajaan Pas Terengganu menyifatkan kedatangan Datuk Seri Dr Mahathir Mohamad ke negeri ini untuk merasmikan Hari Peneroka Negara 2001, di Padang Astaka Ketengah Jaya, Dungun, Sabtu lalu, seperti 'perompak' kerana tidak memaklum dan meminta kebenaran kerajaan negeri.

Pengerusi Jawatankuasa Pertanian, Perikanan dan Ternakan negeri, Abu Bakar Chik (Pas-Batu Rakit), berkata apa yang menimbulkan rasa tidak puas hati di kalangan pemimpin Pas ialah kedatangan Perdana Menteri itu disambut dan dihadiri lebih 20,000 orang.

Berucap menggulung perbahasan Belanjawan Negeri 2002 di Dewan Undangan Negeri, hari ini, beliau berkata, pegawai kerajaan juga dikerah menghadiri majlis itu.

Datuk Abu Bakar Ali (BN-Kemasik) bangun dan meminta Abu Bakar menarik balik tuduhan perompak yang dilemparkan terhadap Perdana Menteri.

"Kedatangan Perdana Menteri itu seolah-olah negeri ini tidak bertuan, sedangkan mempunyai Sultan, Menteri Besar, dewan dan ahli dewan, termasuk wakil BN," kata Abu Bakar Chik.

Katanya, bukan saja Perdana Menteri malah menteri dan timbalan menteri juga datang tanpa memaklulkannya kepada kerajaan negeri kecuali Menteri Pertanian yang datang untuk menandatangani perjanjian persefahaman (MoU), baru-baru ini.

"Tindakan itu membuktikan kerajaan Pusat tidak mengiktiraf kerajaan negeri yang mempunyai rakyat berdaulat. Ini membuktikan mereka tidak beradab dan beretika," katanya.

Abu Bakar berkata, beliau rasa terhina apabila seorang yang dianggap pemimpin besar dunia bersikap tidak bermoral, diikuti pemimpin lain untuk memecah-belahkan rakyat.

"Kalau Umno rasa kontrak sosial tidak lagi sesuai, lebih baik dibuat kontrak sosial yang baru atau guna saja sistem komunis," katanya.

Beliau juga kesal pemimpin Umno menjalankan kempen kotor di negeri itu.

"Wakil Ajil dan bekas Ahli Exco negeri, Ahmad Said turun ke Nerang meminta penduduk tidak hadir di majlis penyampaian geran tanah oleh Menteri Besar, Datuk Seri Abdul Hadi Awang, esok," katanya.

Ketika diminta pengesahan, Rosol Wahid (BN-Ajil) mengaku pergi ke Felda Nerang, Kemaman.

Katanya, beliau bukan marah tetapi sepatutnya berunding dan jangan sekat program pembangunan yang hendak dilaksanakan kerajaan.

"Kalau hendak berkempen sedemikian tunggulah pilihan raya akan datang, dan Pas bersedia undur jika kalah," katanya.

Abu Bakar juga mengaku ada sebuah surau di Kampung Batu 18, Jalan Kelantan yang dijadikan tempat membela 3,500 ekor ayam.

"Pergolakan juga berlaku di kawasan itu, termasuk cubaan menakutkan guru yang hendak membuka pondok di situ.

"Bagaimanapun, ada perbuatan khianat dilakukan tetapi tidak diketahui motifnya, termasuk membawa kakitangan televisyen untuk membuat rakaman ayam dipelihara dalam surau," katanya.

(END)